



O Concello de Nigrán continúa a traballar na Axenda 21 Local. A seguinte tarefa será a realización dunha enquisa sobre a calidade de vida no concello e os hábitos sostíbles presentes entre a poboación. O concello de Nigrán pretende, a través da Axenda 21 Local, acadar un modelo de desenvolvemento sostíble que contribúa a mellorar a calidade de vida.

Con este fin elaborárase un plan de acción, coa participación de todos os axentes sociais do concello, que integre políticas económicas, sociais e ambientais.

Nestes momentos o proceso está na súa fase inicial, centrándose o traballo na recopilación de información para saber cales son as necesidades, carencias e prioridades que, segundo a poboación, son necesarias para mellorar o concello. A tal efecto, o día 14 de abril comezará a realización dunha enquisa, que será efectuada telefonicamente e que se poderá completar en apenas 5 minutos.

Nela preguntárase sobre os distintos aspectos da vida no concello, tales como as dotacións dispoñíbles, o urbanismo, a mobilidade e o transporte, os hábitos de compra, ou a presenza de hábitos sostíbles como a reciclaxe, entre outras cuestións. Obterase así unha visión de cal é o estado da situación e cal é a necesidade de mellora.

Os resultados da enquisa faranse públicos unha vez sexa coñecidos dentro do marco dunha política de ampliación da participación cidadá e de fomento da involucración da cidadanía nos asuntos políticos.

O Concello e os responsables do proxecto piden a colaboración dos habitantes do municipio xa que a participación cidadá é a base e o elemento vertebrador da Axenda 21 Local e sen esta colaboración sería imposible levar a cabo este proxecto que ten como obxectivo a mellora e a sostibilidade do municipio.